



ATASSUT

UKA15/99

Steen Lyngø

03.11.2015.

uunga siunnersuut: Nioqqutissanik eqqussuinermi akitsuutit pillugit Inatsisartut inatsisaata allangortinneqarneranik Inatsisartut inatsisaat nr. xx, xXx 2015-imeersoq.

(Aningaasaqarnermut Aatsitassanullu Naalakkersuisoq)

Inuiaqatigiittut inuunerissaarnerput attatiinnassagutsigu aammalu atuisutut akiliuteqartalissanngikkutta taava pisariaqarpoq aningaasaanut inatsisit aqputigalugit aningaasalersuinissaq.

ATASSUT-mit aklerlaarput akitsuutit imaluunnit akileraarutitigut qaffaalluni imaasiallannerinnakkut aningaasaqarnikkut unamillernartut matussuserniarneqartarneri, qanorluunniit ukiumi aggersumi aalisarnikkut iluanaaruteqarluarnissaq isumalluarnartigigaluarpat, taamaattoq inuunerissaarnitsinnut aningaasartuutit aappagu qaffariaateqassapput. Inuunerissaarnermi atugassarititanut naatsorsuuteqarneq soorlu peqqinnissaqarnerup tungaatigut aamma qaffakkiartorput, inuiaqatigiinnilu innuttaasut sulisinnaasut ikiligaluttuinnarlutik, utoqqalinersiuteqarnissamillu pisariaqartitsisut amerliartorlutik tassa imaappoq pisortat aningaasartuutai qaffasinneruleriartorput.

Aningaasartuutit tamakku matussuserniarlugit isumaqatiginniarnissaq pisariaqarsimavoq, tamatumallu kingunerissavaa maannakkut akitsuutit atuuttut qaffariaateqarnissaat. ATASSUT-mit – soorlu ullumi siusinnerusukkut oqaatigisatsit aningaasanullu inatsisip siullermeerneqarnerani, pimoorullugu anguniarsimavarput, akitsuusersuinerit inuiaqatigiinni equngasumik eqquinnginnissaat.

ATASSUT-mit pimoorullugu suliniutigisimavarput, ikummatissanut nunattalu avataaniit neqit tikisitat akitsuutaasa qaffanneqannginnissaat, taamatut qaffaaneq inuiaqatigiinnut equngasumik sunniuteqartussaammat. Naalakkersuisut taamatut kissaateqarnerput tusaaniarsimavaat, isumaqatigiissuteqartoqarsimallunilu naalakkersuisooqatigiit aamma tapersersorsinnaasaannik.

Akitsuusersuinerulli pinngitsoorsinnaannginnerani, ATASSUT-mit toqqarsimavarput Naalakkersuisut siunnersuutaasa ilaannut tapersiinnissaq, tassalu nioqqutissat peqqinnanngitsut qaffasinnerusunik akitsuusersorneqarnissaat. Taamatut peqqinnanngitsunik akitsuusersuinerup ilaatigut kingunerisinnaasarpaa, amerlasuunit nioqqutissap pisiarerusukkunnaartarnera, taamaasillunilu aamma nalinnaasumik kingunerisarlugu inuiaqatigiit aningaasaqarneranut pitsaasumik sunniuteqarsinnaanerani, tassalu peqqissutsimut aningaasartuutit annikilliallaateqarneranik.

Taamatut ATASSUT-mit oqaaseqarluta siunnersuut taperserlutigu taasinissarput matumuuna nalunaarutigissavarput.